



Kalaallit Nunaanni pinerluttulerinermi inatsisip aamma Kalaallit Nunaanni eqqartuussisarnermik inatsisip allangortinneqarnissaat pillugu inatsisissatut siunnersuummut (Tarnikkut nakuuserfigineqarneq pillugu aalajangersagaq immikkoortoq) aamma Pillaasarnermik inatsisip allangortinneqarnerata ilaanik aamma inatsisit assigiinngitsut allat Kalaallit Nunaannut atuutilersinnissaat pillugu peqqussummut missingiut pillugu Kalaallit Nunaanni Namminersorlutik Oqartussat akuersissuteqarnissaat pillugu Inatsisartut aalajangiiffigisassaattut siunnersuut.

(Aatsitassanut Inatsisillu Atuutsinneqarnerannut Naalakkersuisoq)

(Siullermeerneqarnera)

Demokraatit iluarisimaarpaat, Naalakkersuisut siunnersuut una saqqummiuummasuk.

Siunnersuutip ilaatigut tunuliaqutigaa, Inatsisartut Ukiaanerani katersuunnermi 2021 Demokraatit ilaasortaataata Anna Wangenheim-ip Europarådip arnanut nakuuserfiginnittarnerup pinaveersaartinnissaanut akiornissaanullu aammalu angerlarsimaffimmi nakuuserarneq pillugu isumaqatigiissutaata akuersaarnissaanik siunnersuuteqarmat (ulluinnarni Istanbulip isumaqatigiissutaanik taaneqartartoq).

Isumaqatigiissutip naalagaaffiit ilaasortaasut pisussaaffilerpai arnanut nakuusernerit sulluunniit aammalu angerlarsimaffimmi nakuusernerit, tassani aamma tarnikkut nakuusernerit tamarmik pillagaassutigineqartassasut. Taamaattumik tarnikkut nakuusernerup pillagaassutigineqartalernissaanut apeqqutaasoq, isumaqatigiissut tamakkiisumik malissinnaaneripput.

Tarnikkut persuttaanerup ilisarnaatigaa, inuup uteqqiattumik inuk alla assersuutigalugu nakkarsarlugu, nikanarsarlugu, soorasaarlugu imaluunniit qanigisaanit avinngarutsikkaagangu. Nakkutiginiarlugu imaluunniit inuup allap inuunera killilersorniarlugu.

Tarnikkut persuttaaneq ajornartorsiut angisoorujussuuvoq, ajorluinnartumik kinguneqarsinnaasoq, pinerluffigitittup imminut tatiginera imminullu naleqartinnerata nungulluinnarnerani kinguneqaataasinnaasut ilaat, taannalu soorlu assersuutigalugu kinguneqarsinnaavoq annilaanganermik, isumatsannermik ajorluinnartumillu kinguneqarsinnaalluni imminut toqunermik kinguneqarsinnaagami. Tarnikkut persuttagaaneq malitseqakkajuttarpoq timikkut persuttaanermik imaluunniit allatigut naapertuilluunngitsuliorfigineqarnermik.

Tarnikkut persuttaaneq akuerineqarsinnaanngilaq, uagullu inuiaqatigiittut tarnikkut persuttaanerup akiornissaa ukkatarisariaqarparput.



Taamaattumik Demokraatit nuannaarutigaat, uunga inatsimmut isumaqataasoqarneratigut maannakkut ilimanarsisoq, tarnikkut persuttaanerup pillarneqaataasinnaalernissaa Kalaallit Nunaanni. Kinaluunnit tarnikkut persuttarneqartussaangilaq, tarnikkullu persuttaasoq pinngitsoorani pillarneqartariaqarpoq.

Tamanna tunngavigalugit Demokraatit siunnersuut taperserpaat Inatsisillu Atuutsinneqarnissaanut ataatsimiititaliami suliareqqitassanngorlugu innersuussutigalugu.